

REGIONAL NEWS BULLETIN

HEADLINES (MORNING)

- 1. Ramchhunga state hrang hrang Goods and Services Tax dinhmun tarlanah Mizoram GST chu nikum 2025 May thla chhunga khawn aiin kumin May ah za zela 12 in a pung.
- 2. Chief Minister Pu Lalduhoma’n Lunglei kawngpui pawimawh ATL Road thawm tha turin sawrkarin chak takin hma a la mek tih a sawi.
- 3. Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tum 135-na tur a ni ang.
- 4. Venezuala a lirnghing natak avang a thi zat chu 589 an tling tawh a, mi sangthum chuang hliamtuar an awm bawk.
- .

<><><>

GST

Ramchhunga state hrang hrang Goods and Services Tax dinhmun tarlanah Mizoram GST chu nikum 2025 May thla chhunga khawn aiin kumin May ah za zela 12 in a pung.

Ministry of Finance tarlan danin India ram chhiah khawnna atan July 2017 atangin GST hman anih hnuah rampum huapa GST khawn chu a pun belh zel a, nikum 2025 May thlaa GST nena khaikhinin a punna chu cheng vbch 6012 niin za zela 3.2 a ni a, amaherawhchu India ramin kumin 2026 May thla chhunga GST chhiah a khawn zat cheng vbch nuai 1 sing 9 sang 4,184 aiin April thlaa khawn cheng vaibelchhe nuai 2 sing 4 sang 2,702 chu a tam zawk a ni.

Voicecast

Ministry of Finance tarlan danin nikum September 22 atangin Goods and Service Tax (GST) chhiah thil chi hrang 375 ah tih hniam a ni a. In chhung bungrua leh khawsak relna chi hrang hrang atanga motor lam chi thlenga GST rate hi tih hniam leh thil thenkhat phei chu chhiah lak lohna rate 0% a tih hniam a ni.

(Desk)

<><><>

SIR DIGITISATION

Electoral Roll Special Intensive Revision (SIR) kal mekah Mizoramah enumeration form digitise zawh fel a ni ta a SIR thawh thumna a state zo hmasa ber a ni.

Mizoram chhunga Booth Level Officer (BLO) 1,301-te chuan May ni 30 atang khan Special Intensive Revision atana Election Commission of India (ECI) thupek angin vote neite inziahluhna tur lehkha sem chhuah, laklet leh digitise hna hi ngawrh takin an thawk a. June ni 28 a zawhfel tura ECI hun biktuk hma ni 4, Ningani tlai khan digitisation hi zawhfel vek a ni ta a. SIR thawh thumna kalpuitu state 16 leh UT 3-te zingah Mizoram hian digitisation hi a zo hmasa ber a. Tuna electoral roll hman lai mekah hian vote nei 8,75,068 an awm a. He tih lai hian enumeration form sem chhuah tawh lak kir theih loh hi 48,434 a awm a. An zinga mi 21,194 te chu electroal roll a chuang si thi tawhte an ni a. Hmun danga insawn ngeth tawh mi 14,179 an awm a. Hmuh zawh loh hi mi 8,571 an awm a, inziaklut tawh sa mi 2,161 an awm bawk.

Hei bakah hian mi 329-te chu sakhaw rinna avang, a bik takin Sakawlh number a inhnamhnawih hlahv vanga inziaklut duh lote an ni a. Hetiang rinna avanga inziak lut duh lo hi Mizoram hmun hrang hrangah an awm a ni.

(Desk)

<><><>

CM ON LUNGLEI

Chief Minister Pu Lalduhoma’n Lunglei kawngpui pawimawh ATL Road thawm tha turin sawrkarin chak takin hma a la mek tih a sawi.

Nimin khan Lungleia C. Thuamluaia Mualah Lunglei HPC Cup 2026 hmawr bawkna hun hmanpuiin Pu Lalduhoma chuan Lunglei hmasawwna tur hrang hrang sawiin C. Thuamluaia Mual Zan lama inkhelh theiha siam turin Flood Light dahna tur sum dah fel ani a ti a, Lunglei kawngpui pawimawh ATL Road thawm tha turin theihtawp an chhuah tih sawiin heng bakah hian tui hnianghar tak a awm theih nan theihtawp chhuah ani a ti bawk.

Chief Minister chuan Urban Infrastructure Development Fund 2025–2026 atangin Lunglei tan cheng nuai 525 dah a ni a ti a, Lunglei Municipal Council (LMC) hnuaia Lunglei tihhmasawwna tur project hrang hrang hmasawwna tur pawm ani a ti bawk.

<><><>

HOME MINISTER

Home Minister Pu K Sapdanga chuan a enkawl thin DP&AR a chan zui tawh loh chungchang chu Chief Minister thuneihna liau liau a ni a ti.

Nimina a chenna Ina chanchinbumi thenkhat a kawmnaah Pu K Sapdanga chuan a enkawl thin DP&AR Chief Minister in a chan tak chungchanga zawhna chhangin department enkawltu siksawi chu Chief Minister thuneihna a nih thute, a tul a tih angin a siksawi a, a duh chuan midang pawh a pe thei tih a sawi a. DP&AR enkawl chu a hautak hle tih midang kuta a awm ta chu lawmawm a tih thute Chief Minister hian a enkawl hneh viau a rin thu a sawi.

Pu K. Sapdanga chuan an sawrkar hmalakna leh hmasawwna hrang hrang tarlangin, e-office kalpui a nih hnua sawrkar pisa hnathawh a chak zawk thu leh Right to Information (RTI) zawhnate pawh awlsam zawka chhan zung zung a nih tawh thu a sawi a. Chhan ran leh ran loh aia pawimawh chu a chhanna a dik em tih a nih zawk thu a sawi a ni. Rorellai ZPM party chhungkuaah boruak tha lo a awm ang thuthang chungchangah ngaihdan in ang lo neite chu an awm a, hei chu pawl dangah pawh a awm tho a ni a ti. NDA zawm chungchanga Chief Minister nen an ngaihdan a in-an thu a sawi a, NDA chu zawm kher lovin thian tha tak atan erawh chuan tha an ti a, hei hi a an sorkar tirah an ngaihdan a nih thu leh Chief Minister pawhin a la vawng nia a hriat thu a sawi a ni.

(Desk)

<><><>

POOL & SNOOKER

Mizo thalaite ah tunlai hian Pool leh Snooker khelh an intih hmuh thar nasa hle a, Pool leh Snooker infiamna tuipui tam tak zingah rampum huap chawimawina dawng an awm belh zel.

Mizoram Snooker & Billiards Association Treasurer Pu Laltanpuia sawi danin tun dinhmunah Mizo thalaiten Pool leh Snooker khelh an uar chho hle a, thalai hmabak eng tam tak an awm tih sawiin rampum huapin Mizoram chu tha pawl an nih thu a sawi a, Mizoram aiawhin Rampum huapa lawmman dawng tam tak an awm tawh tih sawiin Mizo Player tha Lalrina Renthlei bakah Mizoram aiawh an awm chho zel tih sawiin hmakhaw eng tak tak an nei tih a sawi.

Pu Laltanpuia sawi danin Vision Olympic 2036 hnuaia inbuatsaihna kal mekah Pool leh Snooker game chu telh ve ngei an tum a ti a, Commonwealth Games leh National Games ah pawh telh tum ani tih sawiin hetah hian Mizo thalaite tan tel ve na hun tha ani tih sawiin Mizoram hming lan theihna anih ngei a beisei tih a sawi.

MSBA Treasurer sawi danin Pool leh Snooker infiamna chu thalaiten an tui thar chhoh mek laiin thiamna ngeth tak a awm theih nan Mizoram in Coach mumal tak an neih a pawimawh thu a sawi a, Mizoram Snooker & Billiards Association chuan kuminah kum 25 a tling dawn tih sawiin tunhnaiah hlawhtling takin Inter College inelna an buatsaih tawh a ti a, mumal zawka hmasawwna a awm theih nan Coach mumal tak nena thangthar zawk te an inzir chu an ngai pawimawh tih a sawi.

(Desk)

<><><>

TRAFFIC VIOLATIONS

Aizawl Traffic Police chuan Ningani zan khan Aizawl khawpui chhungah dan bawhchhia a lirthei khalh an vai a, dan bawhchhia mi 58 an man.

Traffic Police-te hian Ningani zan dar 9 leh nimin tuk khawvar dawn thleng khan lirthei dap hna hi an thawk a. An man zinga 18-te chu kal phal loh zawnga tlan an ni a, helmet khum lo mi 15 an man bakah driving licence nei lova lirthei khalh 5, bike tihrinna vuah mi 3 an man bawk a. Rui chung a lirthei khalh mi 3 bakah dan bawhchhiatna chi hrang hrang – hlauhawm taka lirthei khalh, luh phal lohna kawnga lut, phal aia tam mi phur leh phal loh chi helmet khumte mi 14-te an man tel bawk a ni.

Traffic Police-te chuan inthlahdah tak leh midang harsatna siamsak hreh hauh lova lirthei khalh ching an awm chu pawl an tih thu an sawi a. Aizawl khawpui a lo him theih na’n leh him leh thlamuang taka mipui-in kawngpui an hman theih na’n a tul anga lirthei khalhtu dan bawhchhiate endik hna hi kalpui zui zel an tum thu an sawi bawk a ni.

(Desk)

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

DEPARTMENT REJIG

Mizoram Sorkar chuan Ningani khan Secretary thenkhatte department chanpual tidanglamin tun lai a sawi hlawh tak DP&AR chu Pu K. Lalthawmmawia laksakin Disaster Management & Rehabilitation (DM&R) leh Cooperation Department Secretary Pu Udit Prakash Rai pek a ni.

DP&AR Secretary Pu K. Lalthawmmawia hi Minister Pu K. Sapdanga chanpual he department chhuhsak a nih atanga chawlhkar khatna-ah chiah a department enkawl pahnih UD&PA leh DP&AR hi chhuhsak ve ve a ni a. School Education leh Sports & Youth Services department-te pek a ni thung a. Pu Udit Prakash Rai hian Cooperation department chang zui-in DM&R chu special secretary Pu Sushil Singh pek a ni a, Cooperation leh DP&AR a chang tawh dawn a ni. Puan tawh angin rorellai ZPM party thuneitu sang political affairs committee (PAC) duhdan angin June ni 18 khan DP&AR chu Home Minister Pu K. Sapdanga chhuhsak a ni a, Chief Minister Pu Lalduhoma’n a chang ta a. He mi kal zelah hian DP&AR hi a changtu Secretary Pu K. Lalthawmmawia laksak a ni leh ta a ni.

Eptu party-te chuan DP&AR chang thartu Secretary Pu Udit Prakash Rai, AGMUT cadre IAS officer hi CBI, Enforcement Directorate leh Delhi ACB-te’n thubuai an lo siamsak tawh leh thamna dawn chungchang leh lehkha lem siam thubuai awrh mek niin an sawi a. Sorkar thiltih dan hi an sawisel nasa hle a ni.

(Desk)

<><><>

PM MANN KI BAAT

Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tum 135-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

(Newsonair)

<><><>

VENEZUELA EARTHQUAKE

Venezuala a lirnghing natak avang a thi zat chu 589 an tling tawh a, mi sangthum chuang hliamtuar an awm bawk.

Nimin khan chhanchhuah hna thawktu te chuan lirnghing thlenna hmun leh khawpui ah te hna thawk in an la buai hle a, Caracas khawpui leh a bulhna a tuipei kam a building chim hnuai ah mi engemawzat an la tang ni a rin a ni. Lirnghing hmasa zawk hi 7.2 a na a anghin hnu lawk ah 7.5 ana in a nghing chhunzawm a, chhiatna nasa zawk a thlen phah ta a ni. President chuan he chhiatna avang hian state emergency a puang.

(NewsonAIR)

<><><>

HOME MINISTER

Home Minister Amit Shah chuan nimin khan India hmathlir Drug Free India tihhlawhtlin nan Roadmap kimchang tak a siam. Narcotics Control Bureau buatsaih meeting ah Home Minister chuan kum 2026 atanga 2029 chhung a Narcotics control chungchang document a tlangzarh bawk.

Hemi hma a Coordination Centre a 10th Apex Level Meeting ah thu sawiin, ruihhlo donna kawng ah inpumkhat angaih thu a sawi a, ruahhlo hian ram hmelma, khawtlang nun ralmuanlohna te, sum leh pai leh thlalai nun nasa tak a a tihchhiat thu sawiin, ruihhlo do kawng ah mitin te tanrual pui ah a sawm a ni. Home Minister hian Drug Disposal Fortnight a tlangzarh bawk a ni.

(NewsonAIR)

<><><>